

Exposicion individual “Beisnan Inspirando e Alma” di Ruthy “Lady Ruth” Vrieswijk na Instituto di Cultura Arubano



ORANJESTAD – Diamars ultimo tabata un dia special y inolvidabel pa e poeta, locutor y awor pintor, Ruthy Vrieswijk, cariñosa y popularmente conoci como “Lady Ruth”. E dia ei den oranan di anochi y dilanti un grupo di invitadonan masha special, Ruthy a haci apertura oficial di su prome exposicion individual bou e

number di “Beisnan Inspirando e Alma” (Soul Stirring Moods Swings), den e kapel di arte na Instituto di Cultura Arubano. Ruthy ta un persona masha sensibel pa loke ta arte of cualkier expresion artistico. E ta conoci den mundo di literatura local como poeta, skirbiendo y recitando poema cu ta sali publica cu

hopi frecuencia den prensa Arubiano. Otro faseta di Ruthy ta su habilidad y sensibilidad pa cultura, specialmente pa musica culto of musica autoctono Arubiano. Pesei tur amante di e tipo di musica aki y di poesia por disfruta di Lady Ruth su programa radial cu e mes ta dirigi, esta “Dushi Awacero Musical”, tur



diasabra na Radio Kelkboom. El a yega di tuma les di bailamento di jazz y folklore, loke ta confirma nos un biaha mas cu Ruthy Vrieswijk ta un persona polifasético pa loke ta arte. Awor e ta muestra nos su talento y habilidad artistico pa loke ta arte plastico dor di su exposicion “Beisnan Inspirando e Alma”. E ta un conhunto di obra di tur caliber cu Ruthy a yega di traha den e ultimo añanan. Ruthy su

obranan tin un tendencia abstracto al estilo Miro, aunke nos por aprecia algun obra figurativo tambe. Tur hende interesa di aprecia e exposicion aki por bai libremente na Instituto di Cultura Arubano, te dia 27 di mei cu e exposicion aki, “Beisnan Inspirando e Alma” (Soul Stirring Moods Swings) di Ruthy “Lady Ruth” Vrieswijk lo keda habri den kapel di arte na ICA.

